



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Naalackersuisut siulittaasuata Inatsisartut 2019-imi ukiakkut ataatsimiinerat ammarlugu oqalugiaataa tunngavigalugu oqallinneq.

Asasakka ataqqinartut innuttaasut sineriatsinni isorartoqisumi najugaqartut Nunatta kangiani Ittoqqortoormiinngaaniit Tasiilaq, nunatta kujataa Narsarmijit, kitaani avannaarsua Siorapaluk tikillugu najugaqartut. Taamatullu qinikkat Inatsisartut Naalackersuisullu taamatullu aamma sulisut qilanaaraagut suleqatigeqqinnissai.

Partii Naleraq sinnerlugu Naalackersuisut siulittaasuata oqalugiaataa oqaaseqarfiginnginnerani imatut oqaaseqaateqarusuppugut Partii Naleqqamiit

Siullermik Maannakkut Ummannami ajunaarnersuartut ittumik Ummannarmiut nalaataqarput Imeqarfiat oliamik kukkusoqarneratigut akoqalersimanera pillugu.

Nunap inui imaannaangitsumik eqqugaapput, piaartumik immikkut ittumik qanoq iliuuseqarasuartaqarluinnartoq Partii Naleqqamiit isumaqarpugut. Tunitsiveqarnikkut eqqugaapput, piaarnerpaamik umiarsuarmik tunitsivilertariaqarput aaqqiisoqarnissaata tungaanut atuutussamik.

Atuarfiit matoqqasussanngorput inuiaqatigiinnullu assigiinngitsorpassuartigut eqqugaapput piaartumik qanoq iliuuseqartoqartariaqarpoq.

Taamatut kaammattuuteqareerluta imatut oqaaseqaateqassaagut.

nunap inui pillugit suleqataanissatsinnut maani ukiakkut ataatsimiinnermi aammaarluta tamaviaaruteqarnissatsinnut qilanaarpugut, taamatullu qilanaarpugut Inatsisartoqatigut Naalackersuisullu immersueqataaffigissagatsigut pissutsit piviusut innuttaasut nunatsinni nunap inuisa atugaat pillugit.

Nunap inuisa atugaat pillugit pitsanngorsarusulluta aammalu tusaaneqarneruinnaratik aallaaviginerullugit siuarsarnissaat taamatullu pitsanngorsarusulluta qineqqusaarnikuuvugut.

Tamakkulu qineqqusaarnermi toqqammavigut siunissaq qaninnerusoq ungasinnerusorlu isigalugu siunnerfiit toqqammavigalugit sulinitinni taamatullu nunap inui pillugit tamaviaaruteqarnitsinnut tunngaviussapput.

Suleqataarusuppugut isummat allaanerusinnaasut inissaqartinneqartariaqarluinnarnerat tunaartaralugu, ataatsimut naapiffeqarsinnaaneq qitiusariaqarluinnarmat inuit ataasiakkaat aqutsinerat qimallugu. Nunap inui aallaaviusariaqartut isumaqaratta.

Suleqataassaagut nunap inuisa atugaasa ilaatigut ilungersunarsilluinnalersimasut saqqummiunneqartarnerannut aaqqiissuteqarnissaq siunertaralugu.



Isummat assigiinnginnerat ataatsimorfiusariaqalerluinnarpoq, isummat saqqummiunneqartartut piviusunut aallaaveqartuummata, piviusuullutillu fantasiuunngilluinnarpoq.

Qulaaniit kisermaassillutik aqutsisut ulluinnarni takusanngisaat aammalu taakkununga ungasippallaalersimasorinarluinnartut saqqummiuttaratsigit imaangilaq tusaqqusaaginnarluta qujageqqusaaginnarluta oqariartuuteqartugut. Naamerluinnaq, nunap inui tusaaneqarnerulertariaqarlunarpugut.

Oqariartuuteqartarpugut iliuuseqarniarlutalu Kalaallit nunatta nunap inuisa ullutsinni atugaat ilaatigut ilungersunarsunartorpassuanngorsimasut pillugit, taakku tusaaneqarnerullutik aammalu aaqqittariaqartut aaqqiivigineqarnissaat saqqummiuttarlutsigit.

ajuusaarnaraluartumik amerlavavallaarput aalajangiiffigineqartartut nunap inuisa piumasaat malinnagit uniorlugillu aaqqiinerit.

Maani inersuarmit aaliangersarneqartartut nunap inuinit sunniuteqartaqaat ulluinnarnilu inuuniarnerannut Naalkkersuinikkut siunnerfiit sunnerneqangaartarlutik ajunngitsumik ajortutigullu.

Naalakkersuisut nunap inuisa kissaataat ajornartorsiutaat tusaagaluarlugit allaat apuuffissigineqartarlutik nunap inuisa atugaat aaqqiivigineqartat ajornartorsiutissaannik milluuginnarneqartarnerat Partii Naleqqamiit akuersaarsinnaanngilarput.

Sumiiffinni amerlavallaani ineriartorneq arriippallaamik ingerlavoq, inuussutissarsiutitigut inerisaasoqanngippallaarpoq paarlattuanik inerisarneqartussaagaluartuni, sanaartorneq kommunip akisussaaffigilersimasaa sutigut tamatigut unittoqqasutut inissisimavoq taamatullu allaat ineriartorunnaartoqarluni uningasoqarluni.

Illoqarfiit annerusut kisimik uukkatarineqarpallaaqaat, puigorneqartutullu illoqarfiit minnerusut taakkulu nunaqarfii inissisimalersimallutik, ineriartortitsineq taakkunani ataqatigiissaakkamik aallarteqqittariaqarpoq.

Innuttaasunut kiffartuussineq pitsanngoriartornera nuna tamaat isigalugu inerisartariaqarpoq, taamatullu sullissineq pitsanngorsaavigisariaqarlunarluni.

Partii Naleraq nunarput tamaat isigalugu, nunallu inui aallaavigalugit saqqummiussisassaagut, tamanna nangittumik ilungersuutigissavarput aammalu oqaatigeqqissavarput politikikkut sulinermit nassuerutigisariaqarlunakkatta ilagaat nunarput isorartungaarmat, tamaat assigiimmik ingerlatsiviusinnaannginnatsigu inatsisiliornikkut. Nunap inui aallaaviusariaqarput sumiiffik aallaavigalugu.



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Taamatut oqariartuuteqartarnitsinnut toqqammavigaarput maani qitiusumi inatsisit naleqqussakkat sumiiffippassuarnut naleqquttanginnerat, taamatullu kalaallit nunatta kujataani naleqqussakkat avanersuarmut, tunumut nunaqarfippassuarnullu isorliunerusunut naleqqutinngilluinnartut amerlavallaarujussuurtut, naatsumik oqaatigalugu nunap inuinit sumiiffinnullu naleqqunnerusumik sinaakkusersuisariaqarlunnalerpugut.

Tassa nunarput tamaat isigalugu taamatullu ataatsimut inerisartariaqarpoq sumiiffiit taamatullu nunap inuisa atugaat aallaavigalugit naleqqussaallutalu inerisaasariaqarpoq.

Aningaasaq aammalu iluanaarnissaq kisimi qitiuvallaarujussuaqaaq, nunap inuisa atugaasa aamma pitsaangorsaaviginissaat siunissamilu aningaasartuutikinnerulernissamut nunap inui sorusuttut pilersikkiartornerini inerisaqqinnermi aallaaviusariaqarlunnartut Partii Naleqqamiit isumaqarpugut.

Partii Naleraq sinnerlugu isummat atukkallu saqqummiuttakkagut assigiinngitsorpassut nunap inuisa tusaaneqarnerulernissaanik peqataatinneqarnerulernissaanik aallaaveqartut ingerlateqqissagatsigit qularutigineqassanngilaq.

Innuttaasut tusaaneqanngippallaaqaat aammalu atugaat pillugit peqataatinneqanngippallaaqaat, taamaammat saqqummiisarneput toqqammaveqassaaq innuttaasut tusaaneqarnerulernissaanik Naalakkersuisut qulaaniit kisermaassillutik aqutsinerat qimanneqartariaqarpoq.

Nunap inuinit atugarissaarnerulertitsinermik aqqutissieqataalluta tusaaneqarnerulernissaanik tunaartaqarluta angusaqarususseqarluta ipoqatigiinnerusariaqalerpugut, ataasiakkaat isumaat kisimi malikkunnaarlugit aallavigiunnaarlugillu.

Ataatsimoorneq isummat assigiinngitsut naapiffiat nunap inui ataatsimoorfeqartut pilersittariaqarlunnalerput.

Pissutsit piviusunik saqqummiussaqaarneq ilaatigullu nunap inuisa atugaasa ilungersunarluinnartut ilaatigut sakkortusinnaasumik saqqummiussortarnerat marrarmik milloornertut taakkartorniarneparluni ilaatigut nipangertinniarneqartaraluarpugut.

Qulaaniit kisermaasserpalaartumik isummat inuit ataasiaakkaaginnaat ingerlatsiviuneri qimallugit nunap inuisa atugaasa ilaatigut ilungersunarluinnartut matuuginnarneqarnissaanut soorlulusooq nipangersarniartaraluaatigut nammineq isummatik kisimik malinnissaat aallavioqqullugu.

Kikkut tamarmik tusaaneqarniarnissaat aammalu ataatsimoortariaqalernerput pillugu tamaviaarnerput ingerlateqqissuarput nipangersinniarneqassanngilagut pissutsit piviusunik saqqummiisarnitsinnut.



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Partii Naleraq sinnerlugu taamatut oqareerluta Naalakkersusiut siulittaasuata ammaanermi oqalugiaataani saqqummiunneqartumi sammisai nalilersorluareerliutigit imatut oqaaseqarfignissuagut.

Maluginiarparput amerlasuutigut oqaluttuarnerusut uteqqiinerinnaat aammalu siunnerfimmik ersarinnerusumik nunatta ataatsimut ineriartorneranut peqataatitsinissamik neriunnermillu saqqummiussifigninera maluginiagassaavoq.

Uggornarpoq saqqummiineq ingerlareersunut oqaluttuarnerinnaamat.

Illoqarfiit mikinerit nunaqarfippassuit uninngasut aammalu annertunerusumik inerisaavigineqaratik sanaartorfigineqanngitsut alloriarfiunissaanik oqariartortoqanngilluinnarnera maluginiagassaavoq, tamannalu uggornnarluinnarsoraarput isumaqaratta nunarput tamaat inerisaaffigineqarnera ingerlattariaqartoq.

Partii Naleraq sinnerlugu ilaasortaasugut aaliangiusimavarput akuerisinnaanatigulu inuit ataasiakkaaginnaat oqartussaattillugit nunap inui qulaatiinnarlugit sulineq ingerlatsiniarnerlu.

Qinikkat amerlanerussuteqartut oqartussaanerat malinneqarunnaarsimavoq. Inuit ataasiakkaat qulaaniit aqutsinerat nalinginnaavallaalersimalluni.

Inuit ataasiakkaat aqutsinerujussuata saniatigut matoqqasorujussuarmik aqutsiniarneq qimanneqartariaqarluinnartoq isumaqarpugut.

Sooq inuiaqatigiinnut aningaasartuutit taama qaffasitsigisorpassuit taama annertutigisut selskab-inut pallittaalisalersorlugit insertuussanngorlugit ingerlanneqarneri akuersaaginnassuagut? Ilumut pissusissamisoorpa suut tamaasa aktie selskab-it kallaallinut nunatsinnullu amerlasuutigut naleqqutinngilluinnartut tunaartaralugit ingerlatsilersimaneq inuiaqatigiinnut nunap inuinut akikitsuinnaanngitsoq ingerlattuarnissaa.

– uagut maani nunap inui nunarpullu aallaavigaluta ingerlatsilerniarta.

Aktie selskabeqarnikkut Naalagaaffiup iluani kiisa rekordtiliisalerpugut akissarsiaqartitsilluta inissimasarnitsinni, tassami ukiumut 750 tusind angullugit akissarsiaqartitsisarpugut siulittaasutitaqarnerinnarmut inuiannut 56.000-inik inuttalimmik kiffartuussisussap qallunaat 5 mio. sinneqartut tamarmik qaangerujussuarlugit.

Maannakkut aalisarnermut suleqatigiissitaliaq politikkerit aammalu susassaqtut peqataatinneqarnerat killeqaqisumik inissinneqarluni suliarineqalersoq allaat siulittaasuat atorfilittaq siulittaasunngortiinnarnagu ukiumut 360 tusind koruuninik akissarsialerlugu sulitinneqalerpoq.



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Inuit inuuniapiloortut taama qaffasitsigisumik nunap inui aallaaviginagit politikikkut suliaasaq atorfinittanut taamatut tunniussorlugit taama akisutigisumik ingerlatsineq soorluuna nunap inui aallaavigaluta naleqqussaqqitariaqalerluinnalersimasoq isiginngitsuusaaginnarsinnaajunnaaripput.

Sooruna atorfinittat aqutsinerata ingerlatsinerat annertusartuarneqarnerat isiginngitsuusaaginnassagipput, sooruna politikikkut aaliangigassat toqqammavilersugassat aaliangiiffigissassat nunap inui oqartussaajunnaarlugit ingerlatsineq selskaberpassuarnut milorujussuunnaripput?

Piffissanngunnginnerpa politikkerit siunnerfeqarsinnaasut takorluuisinnaasut toqqammavilersornermini innuttaasut peqataatinnerullugit ingerlatsisut pilersissallugit.

Ilumut tulluurtuua pissusissamisoorpalu selskabini ingerlatseriaaseqarnitsinni selskab-inut pisortarpassuarnut millionerpassuarnik atuissalluta aammalu siulersuisuinut ingerlatsinermut millionerpassuarnut tunioraaginnassalluta, nutaamik eqqarsarnerua nunap inuinit ingerlatseriaatsit tamakku naleqquttuuppat?

Akiliisussammi ataasiinnaapput tassalu nunap inui. Nunap inui akikinnerusumik aammalu taakku peqataatinneruneratigut ingerlatsisariaqalinnginnerpugut? Uagut Partii Naleqqamiit isumaqarpugut innuttaasut peqataatinneqarnerat oqartussaaqataanerat nukittorsaqqittariaqarluinnalersoq, taamatut ingerlatsiniarsarinerput naammaleqaaq nunap inuinit akisuallaaqaaq. Taakkuuppummi pilliutaajuartut kaasarfiiniit aallerfigineqartuurtut.

Nunarput piniartorsuit kinguaavisa nunagisaat najorparput, ineriartorerup nassatarisaanik piniartuuneq sumiiffinni amerlasuuni qimassimagaluaripput isorliunerusuni aammalumi illoqarfissuarni piniartuuneq suli atuuppoq, taamaakkaluortoq piniartuunerup politikikkut tapersorsorneqarunnaarsimanagera Partii Naleqqamiit akuersaarsinnaanginnatigu oqaatigissavarput.

Piniartut pilliutigineqarlutik kinaassusiiagaapput nunarput nunattalu inui aallaaviginagit inissimalersimavugut, qiviaannartigit Ittoqqortoormiini piniartoqarfiusimasumi piniartut piniakkat siornatigut inuussutigilluarsimasatik maannakkut isiginnaaginnarlugit inissimasalersimapput. Nanorsuit kitaani illoqarfinnut qanillattortartut takuneqartarneri nalaanneqartarneri annertusiartorput, taakkulu ulorianartorujussuurtut isigineqartarlutik, kisiannili taakkutuut ulorianartigaat Ittoqqortoormiinit Upernavimmut, Savissivimmut aammalumi allanut illoqarfiup eqqaanut illoqarfiullu iluanut pisartut allamisut ulorianartigaat, tamakku inoqarfinnut qanillattortut ingerlaannaq pisarineqartalerliarlik inunnik ajutoortoqarnissaa utaqqeqaarnagu aqqisoqartariaqarpoq uumasut taama ulorianartigut pisarineqatalernissaanut.

Upernaaq Upernavimmiut qilalugarpasuit avatangiiseralugit qaleralinniarnermullu ajoqutaaqisumik inissisimanerini pisassaminnik qinnuteqaateqaralarput pisassat ikippallaamut



appartinneqarsimasut saniatigut piasseqqinneqarnissaminnik qinnuteqaateqarlutik toqqammavilersorluakkamik allaallumi qilalukkat qaleraqassutsimut innarliisarmata takkusimaaleraangata.

Tupinnaraluartumillu annertunersumik soqutigineqaratik inissisimaffigineqaannarput, sooruna tamakku taamatut ittuunerat akuersaaginnarneqartoq. Aaqqiisoqartariaqarlunnarpoq pissutsit taamatut ingerlaqqiinnarsinnaanerit akuerineqarsinnaanngilaq. Qanoq iliuuseqartoqartariaqarpoq.

Qaanaarmiut kinaassusiiagaqqapput qilalugartassaminnik aasap ullui atuunneranni pisassaminnik noqqaagaluarpud tusaaneqanngitsutullu ippud pissutsit taamaattut akuersarneqarsinnaanngilat – Aaqqiigasuartoqartariaqarpoq, piniartortagut oqaasiinnaangitsukkut aammalu qineqqusaarnerinnakkut neriorsorunnaarlugit aaqqiifigineqartariaqarput pissutsit taama ingerlaqqiinnarsinnaanerit akuerineqarsinnaanngilaq.

Naalackersuisut piniartuunermut piniartunullu illersuisuujunnaarsimanerat assorujussuaq uggornarpoq. Tamannalu Partii Naleqqamiit akuersarneqarsinnaanngilluinnartutut isigaarput.

Piniartuuneq eriaqisariaqarlunnartut ilagaat qaqugorsuarmut illersortariaqarlunnakkatta amerlasuut ilagiinnarpaat.

Piniartoqarsimangitsuuppat nuna manna inoqarsimassanngikkaluarpog, taamaammat piniartukkormiut kinguaarigaatigut oqaannartarata, oqaasiinnaanngitsumik timitalersuinerusariaqarlunnalerpugut. Oqaatit kusassakkat timitaqanngitsut piniartortatta inuussutigisinnaanngilaat.

Killilersuinerujussuaq sumiiffikkaartumik naleqqussaaqqittariaqarparput, sumiiffiit ilaat ima nuna isorartutigaaq killeqanngitsumik ukiorpassuit piniarfigisimasaat killilersugaanngitsumik aaqqiiffigialuarutigut piniakkat nungunneranik ikileriarujussuarneranni allaat kinguneqarnavianngitsoq tamanna nunaminut ilisimannittup kialluunniit nalunngilaa, kallaallit piniakkanik nungutsinnngisaannarnikuupput aamma siunertarinnngisaannarnikuuaat nungutsinissartik.

Akerlianik avataaneersut ukiorpassuit ingerlaneranni piniapilorujussuarneri ingerlanneqarnikuupput. Nunatta inui aallaavigalugit aaqqiiniarta ullutsinnut naleqquttumik aammalu piniartartunut naleqquttumik aaqqiiniarta, utoqaaseqqissinnaanngilarput aaqqiinissarput.

Piniartortatsinnik illersuisinnaanerusariaqarpugut, nunap allamiut paasisariaqarpaat kulturerippud aammalu nungusaataanngitsumik pinngortitaq nammeneq illersortoq inuuffigigippud.

Qilalukkat tuugaavi avammud tunineqarsinnaaneri aqutissiuullugit ilungersuuteqarnerusariaqarpugut, nunarsuarmioqatitta paasisariaqarpaat taakku nagguaatsut, tassalu elefantit tugaarsuarinnngilai.



Nannut amii avammut tuniniarneqarsinnaaneri pillugit tamaviaaruteqarnerusariaqarpugut, tigeriit løvit nungutaaqqajaasut allat amerinngilaat.

Kalaallit nunatta avataaniittut minnerunngitsumik qallunaat nunaanniittut kalaallinernik nassitsisinnaanerput suliniuteqarfiginerusariaqarluinnarpoq. Aporfissalersuinerit annertuallaqaat, kalaaleqatigut nungusaataangitsumik pisaasunik mamareqisatsinnik sumiikkaluarunilluunniit ikinngutiminnik ilaqutaminnillu nassinneqarsinnaasariaqarput.

Amerlasuut inuusaaseraat kinaassuseraat piniartuuneq, piniatut illersornerusariaqalerpagut.

Tasiilami nunaqarfiinilu ukiorpasuaru qilalugarniartarneq inuusaasiannut ilaalluinnarsimavoq nuna isorartoqisoq aammalu pinngortitaq nammineq illorsortoq avatangiiseralugu angallaffigalugu ungasimut piniarfigisisarsimavaat ilaatigut qilalugarniarfigisarlugu, maannakkut aamma ukiuni amerlavallaalersuni taakku kinaassusiaagaasutut 16-iinnarnik qilalugartassittarlugit piniartoqarfittut allatuulli ataqqinanngilluinnartumik pineqarnerat akuersarneqarsinnaanngilluinnartoq taamatut ingerlaqqiinnarsinnaanerat akuersarneqarsinnaanngilluinnarpoq.

Inuussutissarsiuutitsigut inerisaasoqaqqittariaqarpoq Qaanaaq tunumi allarpasuaru sumiiffiillu aalisartoqarfittut ineriartornerat ilutigalugu piorsaaffigalugllu inerisaaffigeqqittariaqarpagut. Sumiiffipassuaru inerisaaffigineqarusupput peqataarusupput.

Upernavik Uummannaq Qeqertarsuup tunua tamaat inerisaaffigeqqittariaqarput nunatta karsianut annikinngitsumik aalisartut isaatitsuupput, taakkulu ataqqinarnerulluinnartumik pineqatariaqalerput avatangiisaatigut periarfissaatigullu inerisaaffiginerat annertusaannarani qanimut suleqatiginerat annertunerusariaqarluinnarpoq.

Aalisartoqarfiit innuttai aalisarnikkut eqeersimaarlutik aningaasarsiorusullutik piumassuseqarluartut tunisiniartarnerat ilungersunarluinnartoq pitsaannerusumik aaqqiifigigasuaru nissaat pisariaqarpoq, tassani qaqtsiveqarnikkut aammalu pitsaasumik atugassarititigut aaqqissuussifiginissaat pisariaqarluinnarpoq.

Umiarsuaqartarnerit pilersarusiortarnerat sikuiaartarnera Upernavimmi Uummannami allanilu periarfissaqartinnerat pitsaanerulluinnartariaqarput, pisariaqanngitsumik aalisartut aningaasarsiorusuttut aporfissaqarpallaaneri aporfii annikillisarneratigut periarfissaqarluarnissaat aqqustissiuunneqarnerulertariaqarluinnarpoq.

Umiarsualiisarnerit pilersarusiorluarnerusariaqarput aammalu aatsaat pisariaqavissortillugu aaqqiigallarnertut atorneqartarnissaat kaammattuugitinarput, sumiiffinnilu ikaarsaarfeqarnerneri suli pisariaqartuartaallutik.



Nuuk 23.sep. 2019

UKA 2019/15a

Jens Napätök, Partii Naleraq

Kangersuartsiarmit pineqarnerat akuersaarneqarsinnaanngilluinnartut ilagaat, selskabersuit nunap inui pilliutigalugit iliuuserisaat aaqqiiffigineqarnissaat pillugu kaammaatuarnarput ingerlaannassaaq, taamatummi pineqarsimanerat akuersaarneqarsinnaanngilluinnarpoq.

Taamatullu Upernavik kujallermit tassalu Sornorormiut tunitsiveqarnikkut ukiut tamaasa neriorsorneqartuarnerat kinguartitsereqqittuarnerit innuttaasunut siuarsaanissamut piomassuseqartunut innarliisarmat aaqqiiffigineqarnissaat piffissanngorsorinarpoq oqaatsit neriorsuutit naammangillat inuussutigineqarsinnaanngillat, qanoq iliuuseqarnissaq piffissanngorpoq.

Umiarsualiisarneq eqqarsaatigalugu maannakkut Kangersuartsiarmit aammalumi Sornorormiut maannakkut ukiartorsuugaa immap unerisimajunnaarnera eqqarsaatigalugu aaqqiiffigisariaqarlunnaraluarput umiarsuaq tunitsivik sumiiffiit taakku eqqaaniittumik aaqqiiffigalugit. Pilersueqataarusupput aningaasarsiorfeqarusupput aamma eqqaa piniagassalissuummat periarfissaqarnerulerlutik sanaartorfiginearlutik pilerunik nunaqqatitaartussapput amerliartornerulissapput tamanut nunatsinnullu iluaqutaasussamik.

Sumiiffinni assigiinngitsuni pilersaaruteqarluni oqaluttarneq timitaqarnerulertariaqarpoq pilersaaruteqartoqarneranik oqaluttoqariarluni kinguartitsereqqittarnerit akuersaarneqarsinnaanngillat, ilai ukiut tamapajaasa ukiut tamaasa aappaagu pilersaaruteqarfigineqartut kalerrinneqartuarput timitaanik takusaqanngisaannarlutik, pissutsit taamaattut amerlavallaarujussuaqaat.

Nunaqarfippassuit illoqarfeqqaat nunaqqatigiinnguit periarfissarsiorneqarnissaminnik nilliateqaraluarput peqataarusunnerminnik, tamakku timitalersulertariaqarlunnarput.

Sumiiffikkaartumik eqqaat pisuussuteqaqimmat atorluaaneqanngitsunik atorluarneqartariaqarluartunik periarfissarserusunneqaraluarput aammalu nunatta aningaasarsiornerannut tamanna iluaqutaasussaammat qanoq iliuuseqarfigisariaqarpoq.

Partii Naleraq sinnerlugu aammaarluta kaammattuutigeqqissuarput tamakku aqqviginissaanut alloriaqqinnissaanut aamma ingerlariaqqinnissamut qanoq iliuuseqarfigisariaqarlunnalernerat piffissanngortoq iliuuseqarnikkut aningaasaliinertigullu.

Sumiiffinni amerlavallaani nunap inui aallaavigalugit inerisaasoqannginnera akuersaarneqarsinnaanngitsumik atuuttoq qaangertariaqalerparput.

Kangerlussuaq

Kangerlussuaq periarfissanik ulikkaarpoq, Sisimiut periarfissanik ulikkaarpoq, taakkuinnaat qiviarutsigit nunaminertamigut nunatsinni periarfissaginnerpaat ilagigaat kialluunniit



miserratisinnaangilaa aammalu sila eqqarsaatigalugu unerisimanerpaamik silaannalik qujanartumik maannakkut ammaannarnissaa aaqqiffiqineqarluni inissittussanngorpoq Kangerlussuaq.

Miserratinagu oqaatigissavarput Partii Naleqqamiit sumiiffik taama periarfissaqartigisoq uggorigatigu Qallunaat Naalagaaffiat aatsaat akulerunneratigut aaqqiisoqartoqartussanngormat aammalu pitsaanerusumik angusaqartoqarniarluni nunap inuisa iluaqutiginerusaanik aaqqiiniartoqarani isumaqatigiissuteqartoqaannaarmat.

Uggoraarput politikikkut aaqqiiniarluni isumaqatigiinniutigineqarani isumaqatigiinniutigineqarnissaa atsioreernikkut aatsaat qanoq iliuuseqarfiginiarneqarmat.

Illoqarfiit anginerit avataaniittut periarfissanik ulikkaarput, sooruna sumiiffippassuit taama periarfissaqartigisut qarsupinneqarlutillu qaangiataarneqaannartut?

Kangerlussuaq pillugu suliap killiffia qivaraanni aammalu nunatta iluani avammullu angallanneq takornariaqarnikkullu siuarsaaniarneq pillugu Partii Naleqqamiit oqaatigeqqittariaqarparput aallaqqaataaniilli taakkartartortuagarput uppernarseqqiinnarneqartoq, Kangerlussuaq ammatiinnarlugu aaqqiiniarnerit siulliullugit qulaajaaffigalugillu nalilersuiffiqineqaqqaartariaqarsimagaluartut. Mittarfiliortitsernerit naappaallattartut aaliangiiffiginninngerat sioqqullugulu.

Maannakkut killormut sammisumik aaliangersaanerit suliamilu ingerlatsinerit paasiuminaatitsineroqqiliinnarput innuttaasut pilliutigalugit. Apeqquterpassuit akineqarusunngitsut isertuussilluni ingerlatsinerit saniatigut suli apeqqutinik amerlanerusunik qaqileriinnarpoq maannakkumut killiffik aallaavigalugu.

Nunap inuisa akikinnerusumik angalasalersinnaanerit qitiutinneqarani aaqqissuussiniarneq uggornarluinnarpoq. Nunarput isorartoqisoq ataatsimut ataqatigiisseqqaarnagu takornarissat pingaarnertilerlugit nunap inuisa angalasinnaanerat pitsanngorsaavigeqqaarnagu iliuuseqarniarneq assorujussuaq uggornartuuvoq upperineqanngitsutut iinnarani tusaaniarneqanngilluinnarmat uggornartorujussuuvoq.

Mittarfiit sananiarneqartut pillugit toqqammavilersuutaasimasut tamarluinnarmik atorqearsinnaanerit killilerujussuanngorput piviusorsioruujunnaarput. Nalilersuutaasimasut tamarmik qimarratigineqarput, naak ilaasa teknikimut tunngasuunerarlugit eqqartorusunngikkaluaaraat isumaqarpugut pingaartorujussuusoq sukumiisumik eqqartorluarlugillu killiffik aallaavigalugu qanoq iliuuseqartoqartariaqarluinnartoq.



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Nunap inui akikinnerusumik angalasinnaangorlugit aaqqissuussiniarta, tamanna Partii Naleqqamiit ilaatigut pisinnaasoq tikkuareeernikuusarput innersuussutigeqqissuarput, tassalu nunarput ataqatigiissisinnaavarput mittarfeeqqat mittarfinnut 199-meterinut tallilerneratigut, aammalu illoqarfiit mittarfii qanitarisaanut nuunneratigut, taamatullu ukiukkut kaperlattartumi angallanneq ajorsilluinaqqissaartartoq qulimiguulinnut mittarfiisa aaqqissuussiffiginerata saniatigut qulimiguulinnik ullutsinnut naleqquttunik nunatsinnullu naleqqunnerpaanik piorsaaffigineratigut.

Nunaqarpugut isorartogisumi, nunap inui akikinnerusumik eqaannersumillu angalasinnaanerat aaqqissuussiffiginiartigu.

Aperisariaqarpoq mittarfiiit sananiarneqartut kikkunuku iluaqutiginiaraat? Nunap inuisa imaluunniit takornarissat? Kikkut pingaerneruppat? Takornarissat imaluunniit nunap inui? Uagut nalornissutigiginagu nunap inui pingaernerutillugit aaqqeerusukkaluarpuq, qanortoq tusaaneqatsiarta, pissutsit piviusunik qaqlerinerput ila tusaneqanngitsuusaaginnerneqarsinnaangilaq.

Akitsuutit

Partii Naleqqammit erseqqissaatigeqqissavarput akitsuusersuinersuit akerlerilluinnaratigut.

Innuttaasut kaasarfiinut allertuarneq akitsuutitsigut Partii Naleqqamiit isumaqataaffiginngilluinnarpagut.

Taamaammat nalornissutigineqassanngilluinnarpoq akitsuutit sulluunniit akerlerigatsigit aammalu akitsuusersuinersuit Naalakkersuisut eqqunniartuagaat tamaviaarutigalutigit akerlilersortuassagatsigit.

Aningaasanut inatsisissaq saqqummiunneqarnerani Naalakkersuisut sinnerlugit oqaatigineqarpoq saqqummiunneqartorlu akitsuutit qaffassarneqaaqqissasut Partii Naleqqamiit isumaqatiginngilluinnarparput.

Allaffissornikkut matussutissatut akitsuutit gebyrit allallallu annertuallaarujussualersimapput, inuit kaasarfiinik aallertuarneq naammaleqaaq tamaanga killeqartariaqarluinnarpoq.

Akitsuutinik suugaluartunilluunniit qaffassaqqaaqqittuarnissaq piffissaanngilaq aammalu sakkusaanngitsoq Partii Naleqqamiit isumaqarpugut.

Nioqqutissat akiilu

Mittarfiit sineriammi sanaartorneqalermata oqaatigineqartaaraluarpoq niuernikkut nioqqutissatigullu iluaqutaajumaartut, maannakkut akit qiviaraanni akisoorujussuarmik inissisimajuarsinnarput.



Avannaani youhurt-it literimut 100 kr angusalernikuuaat, taamatullu tunumi Ittoqqortoormiini naatsiiat kilumut 60 kr. angusalerlugu, aali tunu europamut niuerfigisatsinnut qaninnerpaajulluni inissisimasuusooq.

Uniorpallaassanngilarput SIK-mi ilaasortaasut tiimimut akissarsiannguisa qaffalaarnerigaluat aningaasap pisissutaasinnaanerata nalikilliarturneranik iluaqutaaganiluunniit akissarsiaasa pisissutaasinnaanerigaluat apparujussuaqqippoq.

Akitsuusersuinerpassuit saniatigut nioqqutissat nunatsinni akiisa qaffasippallaarnerujussuat qaffakkiartupiluuginnarnerat politikikkut isiginngitsuusaaginnarlugu inuit kaasarfiiniit taamatut aalliinnartoqartarnera eqqarsarnartoqaannarani qanoq iliuseqafigiguartariaqarlunnartut ilagaat.

Pisartut illersugaanerulertariaqarput pisinnaatitaaffeqaannaratik tusaaneqarnerusariaqarput, siornatigut, pisartut atuisut siunnersuisooqatigiivini ingelatsisarsimasut maannakkut aatsaat taama pisariaqartigilerput, taakkuummatami sumiiffikkaartumik atuisunut pitsanngorsaataasussanik pisartut atuisullu sinnerlugit suliaminnik nakkutiginniinnaratik pitsaasumik immersuisarsimasut.

Pisartunut akit apparsarniarneqarnissaanut nunanut aallanut suleqateqarnerput nukittorsaqqittariaqarlunnarpoq, Qallunaat nunaat kisimi aallaaviuvallaarsimaqaaq ukiorpassuarni, maannakkullu Royal Arctic Line nunanut allanut ammaassinera ilutigalugu niuernikkut pitsaasumik pisartunut iluaqutaasussamik aporfissaasinnaasut piiarlugit qanoq iliuseqarasuartariaqarpoq siunissaq qaninnerusooq ungasinnerusorlugu eqqarsaatigalugu.

Nunaqarfinni pisiniarfinni piorsaaneq ullutsinnullu naleqqussaaneq qitiusumiit tapersorneqarnerusariaqarlunnarpoq. Ilanngullugu aammarluta Naalakkersuisunut suliaasimasut naammassiniarnissaat tamatumunnga tunngasut sakkortunerpaamik kaammattuutigerusuppagut, tassalu Upernaviup pigisaani Naajaat aammalu Nutaarmiut taamatullu Qaanaap eqqaani Qeqertat pisiniarfinnik innuttaasut pisiniarfissaanik suliniuteqarnerit naammassiniaqqullugit.

Aalisakkanik avammut niuerneq

Aalisakkat akii avammut tuniniarneqartartut nalitulerulersinniarneqarat tamaviaarunnerusariaqarpoq.

Aalisakkat annissorneqaannartut taakkartorneqartartut pillugit aporfiusut piiartariaqarpagut periarfissarsiornerusariaqarpagut naleqarnerulernissaannut aqqutsiueqataasunik.

Taamaammatt sakkussat ilaattut isigisarput piaartumik aaqqiiffigisariaqartut ilagisaat oqaatigiugarput oqaatigeqqissavarput, tassalu selskabsskat 15 %-imut apparnissaa piaartumik aaqqittariaqarpoq, selskabit nunatsinniiginarnissaat aammalu aalisakkat nunani allani



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

niuerutigiginagit nunatsinniit niuerutigiginissaanut aqutissiuinerit annertusartariaqarluinnarparput oqaasiinnaangitsumik timitalersuinikkullu.

Meeqqat atuarfiat

Meeqqat atuarfiisa ingerlanneqarnerat kommunit ulluinnarni akisussaaffigileraluttuinnarpaat, tamannalu tapersorsornarpoq aammalu aningaasaliisarnikkut pitsaasumik inissisimajuarnissaat pitsaasuusariaqarpoq.

Nunaqarfinni illoqarfinnilu mikinerusuni atuarfiit nutarsagassarpasuit suli piupput, taamaammatt qitiusumiit peqataanerunissaq pingaaruteqarpoq, kommunit kisimiillutik nammassinnaangilaat.

Atuarfiit pitsaanngitsuunerat piaartumik tulleriaarilluarnikkut piaarnerpaamik aaqqiiffigineqarnissaat kommunit suleqatigalugit aaqqissuuffigalugit inerisartuarneqarnissaat pingaartorujussuartut Partii Naleqqamiit isigaarput.

Partii Naleqqamiit akuersaarsinnaangilluinnarparput Naalakkersuisut siunnersuutigisaat, tassalu atuarfiit angusaqarnerlussimasut aningaasaliissutitut ilanngaaffigalugit pillarneqartalernissaanik siunnersuut.

Atuarfiit sanngiinnerusutut inissisimareersut nukillaarsaqqinnagit akerlianiguku nukittorsaaffigisassagut, aningaasaq kisimi qitiutittuaannarneqarsinnaangilaq, siunissamut pitsaanerusemik atugassaqarlutillu ineriartortinneqarnissaat qitiusariaqarpoq.

Kommuninut tapiissutaasartut appartinniarneqarnerat Partii Naleqqamiit akuersaarsinnaangilarput, akerlianik isumaqarpugut kommunit nukittunerusemik pitsaanerusemillu innuttaasunut kiffartuusinissaat inissinniartariaqaripput.

Ineqarneq

Nunatsinni ineqarneq inuup inuuneranut pingaaruteqarluinnartut pinngitsoorneqarsinnaangitsut ilagaat.

Inerisaaffigeqqittariaqarput, inissiat nunatsinni 23.000 missaaniittut amerlasoorsuit akii naleqqussartariaqarput – suneqartaralik akitsoriartuinnarsinnaangillat.

Kommuninut INI A/S ingerlataat tunniutiinnarneqarsinnaangillat annertoorsuarmik aningaasartaqartinneqanngippata, taakkumi 6.400 missaaniittuni 174-it kisimik ajoquteqanngitsutut oqaatigineqarput. Taakkunanilu 1.900 nutarterneqarsinnaasutut oqaatigineqarput, taakkulu sinneri 4.500 missaaniittut nutarterneqaratik piiariarlugit nutaanik sanasoqaannarpat akilersinnaanerusut oqaatigineqarluni.



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Allaffissorfiginerujussui akisuallaarnerat aap annikillisartariaqarput, kisianni aningaasartai naammangitsumik kommuninut ajornartorsiut aaqeqqaarnagu miloriutiinnarniarneqarnera Partii Naleqqamiit akuersaarsinnaangilarput.

Nammineq illuliortarneq iluaqutaaqisoq pitsaasumik ineqarnissamut piorsaaffigeqqittariaqarpoq nunagissaaneq ilaalu ilanngullugit.

Aningaasaliissutigineqartut sumiiffiit taama amerlatigisut pineqartillugit qaffasinnerusariaqarput, neriuppugut taamatut kissaateqarnerput pisariaqaqimmata tusaaneqarluni timitalersorneqassasoq. Maannakkumut aaqqiisimaneq ukiorpassuarni uninganikuunera iluatigalugu aatsaat taama pisariaqartinneqartigaaq. 1975-imiit sanaartorneqarsimasut typ 69-it aammalu type 43 ilanngullugit aaqqissuussiffiginissaat utaqeqqissinnaangillat ullutsinnut naleqqukkunnaarput naleqqussaqqittariaqarluinnalerput.

Ilanngaassivik

Naalackersuisooqatigiit tapertaasalu siunnersuutaat Ilanngaassivik Partii Naleqqammit sukumiisumik misissuataareerlugu aammalu nalilersuilluareerluta atorsinnaangilluinnartutut nalilerusupparput.

Allaffissornerujussuaq annertusaqqittariaqanngilluinnarpoq annikillisartariaqartoruna, taamatut aaqqissuussiniarnermi pisortat kisimik iluaqutigiinnarnagu allaffissornermik annertusaataaqqittussamik siunnersuuteqarnerat eqqarsaatigilluagaanngitsutut torrallataanngitsutullu nalilerusupparput.

Taamatut aaqqiiniarnerup allaffissorneq annertunerusoq pilersinnartussaangilaat nassatarisinnaasaalu amerlasuut sunniutipiluutaasinnaasut amerlasuut eqqarsaatigineqarsimarpasinngilluinnarput siunnersuuteqartuniit.

Aningaasat pisiaqartinneqaqisut allaffissornermut qaffasaanermut atoqqinnagit pitsaanerumik siunertaqartumut atortariaqaripput Partii Naleqqamiit isumaqarpugut.

Mittarfiit

Mittarfiit nammineq 2,1 milliard-inik tassalu 2.100.million koruuninik akiiliiffigisassanngorlugit aaliangiiffigineqarput, taamatullu piginneqataanissap 33 %-ia qallunaanut tunniunneqartoq 700 millioninik nalilerlugu tunineqarluni, taamatullu aningaasanik taasersugassanik qallunaat 900 million koruuninik attartitsillutik.

Taamatut aaliangereernerup saniatigut maannakkut aningaasanut inatsisissamut sooruna qaavatigut annertunerumik aningaasaliinissamut piумаqqittut? Naalackersuit 1 milliard koruuninik tassalu



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

1000 million koruuninik piумаqqinnerat sulialluunniit suli aallartinneqanngitsut assorujussuaq eqqarsariaallannarpoq taama annertutigisumik qinnuteqaqqittoqaqqinneranut.

Taamatullu Naalakeersuisut aktieselskab-inik tuniseqqinnissamik isertitassat aamma 170. mio koruunit isertinniarlugit aningaasamut inatsisissami saqqummiuppaat, kisiannili oqaatigineqarani selskabit suut tuniniarneqalersarnersut. Taamaammat aperusunnarput inuiaqatigiit pigisaat suunuku tuniniaqqinniarneqalersut?

Peqqinnissaqarfik

Peqqinnissaqarfimmi sulisut tamaviaarput aammalu sapinngisartik naapertorlugu atugassarititaasut sinaakkutissalu aallaavigalugit innuttaasunut kiffartuussiniarsaralutik.

Partii Naleqqamiit peqqinnissaqarfik pillugu oqaatigisartakkagut oqaatigeqqissuagut

Suliassat annertoqaat aammalu pitsaasumik atugassaqaarlutillu sinaakkuteqartariaqarput, peqqinnissaqarfik atugarliorpoq peqqiilliorpoq qanoq iliuseqarfisariaqarluinnarpoq.

Innuttaasut nunap inui pitsaanerusedumik kiffartuunneqatariaqarput. Peqqinnissaqarfimmut atugasarititaasut pitsaanerulersittariaqarput aningaasaliissutitsigullu pitsanngorsaasariaqarluinnarpugut.

Peqqinnissaqarfimmut aningaasaliissutaasartut qulerarterutaat (1/10) angallannerinnarput atortarpagut. Taamaammat ajornannginnerusedumik eqaannerusedumillu angallassinikkut aaqqissuussisariaqarluinnarpugut, nakorsiarsinnaaneq ajornannginnerusedumiaqarpoq, maannakkut innuttaasut nakorsiarniartarnerat ilungersunarpallaarujussuaqaaq pitsaanerulersittariaqarluinnarparput.

Nuna avannarlerni innuttaasunut agguaqatigiissillugu peqqinnissaqarfimmut aningaasartuutigisartakkagut appasinnerungaarput, taamaammallu aamma kiffartuussiniarsarineq taamaanneranut appasinnerunera atuuppoq. Pitsaassuseq peqqinnissaqarfimmi qaffasinnerusedumiaqarpoq.

Sumiiffinni amerlasuuni peqqinnissaqarfik kiffartuussinerata apparsaavigineqartuarnera unitsillugu pitsanngorsaavigisariaqarpoq – nunap inui peqqinnerusedumik katsorsaaniqqinnarpoq pissanngilaq aamma peqqinnissaqarfik susassaqtullu allat suleqatigalugit peqqinnerulernissarput annertusiartortoq suli annertusarlugu suliniuteqarnerusedumiaqarput.

Sumiiffinni assigiinngitsuni annikillisaaniarsarineq unitsittariaqarpoq, soorlu Aasianni aallanilu ernisinnaaneq aqqutissiuullugu tamaviaarutigisariaqarpoq.



Ittoqqortoormiit isorartoqisumi inissisimasoq nakorsaarunnissaanik aliangerit akuersarneqarsinnaanngillat. Tamanna ajornerusumik ingerlatsilernermit assersuuterpassuit ilagiinnarpaat.

Sumiiffippassuit ilaanni periarfissat pitsanngorsaavigineqanngillat, sanaartorneq uninngavoq ineriartortitsineq uninngavoq, illuliortitsinerit uninngapput allaat aamma inuiaqatigiinni nunaqarfeqarpugut sulii illu sulliveqalersimanngitsuni pisariaqartinneqarlunnartunik, soorlu Kangersuatsiami Sornorumilu.

Nunanut allanut politikki

Nunanut allanut politikikkut oqartussaassuseqarnerulernissarput aammalu iluaqutiginerulernissaa nammineq aallaaviulluta oqartussaaneq peqataaneq annertunerusoq pigisariaqalerparput. Danmarmikkimut suleqatigiinneq ingerlajuassaaq, kisiannili taakku kisimik aallaavigalugit aammalu oqartussaaneq aallaavigalugu ingerlajunnaarluta nammineq peqataanerulertariaqarpugut.

Danmarki avammut kisimi aqutissaanngilaq nunarsuarmioqataarusuppugut, nunarsuarmioqataansinni nammineq ilusilersueqataalernissarput oqaloqataalluta peqataalernissarput piffissanngorpoq.

Ilinniartitaanerput qaffassaqqittuartaqarparput nunat allat aammalu Amerika suleqatigalugu inuusuttatut periarfissaqarnerunissaat anguniaqarfiguartaqarparput.

Utoqqaat

Utoqqaat saniatigut suliffeqarnikkut aningaasarsiornerulersinnaanerit ajunngilaq, kisianni sulisinnaanngitsut asuli neriorsupilunneqaannaqqilernerit akuersarneqarsinnaanngilaq, utoqqarnut neriorsuuterpassuit ajuusaarnaraluartumik oqaasiinnaasimapput oqaatsit kusassakkat imaqqanngitsut, tamanna aningaasanut inatsisissamut annertunerusumik oqaaseqarfigiumaarparput.

Utoqqaat illersuisoqalernissaanut aningaasat aningaasami inatsisissamut immikkoortinneqarsimasut amigarujussuarput, taama appasitigisumik illersorneqarlutillu kiffartuunneqarniarnerit Partii Naleqqamiit akuersaarsinnaanngilarput. Tamanna aamma tamakkiinerusumik aningaasanut inatsisissamut oqaaseqarfigeqqittaassvarput akuersarneqarsinnaanngilluinnarmat.

Pinnngortitalerineq

Pinnngortitat avatangiiserlu Eqqagassalerineq aamma selskabersualiuuteqqilerpoq? Pisortai siulersuisuulu akissarsiakkaat atuisut akilersugassaat, nunatsinni inuuniarneq akisoreeqisoq aamma sulii akisuninngorlugu aqqinniarneqalerna? Piviusorsiorpa Illoqarfiit anginerit kisimik aallaavigalugit eqqaavilerilernissarput?



partii naleraq

Nuuk 23.sep. 2019

UKA 2019/15a

Jens Napätök, Partii Naleraq

Naalackersuisut siulittaasuata naggasiutigalugu oqaaserisaa Moses Olsen ooqarneratuut:

Issuaaneq aallartippoq

”Qaa, kalaallit suli atasiusutut takutinniartigut.

Tunumiugutta, kitaamiugutta, avannaarmiuugutta imaluunniit kujataarmiuugutta: Nuna tummagarput ataasiinnaavoq!

Issuaaneq naavoq.

Illumut nunarput sumiikkaluaruttaluunniit nuna tummagarput ataasiinnaavoq, tamanna puigornagu sumiiffiit tamarmik nunap inui aallaavigalugit aamma inerisaqqinniartigu sumiiffiit ilaannaat inerisarneqarsinnaangilaq, sumiikkaluartulluunniit peqataarusupput aamma inerisaaffigineqarlutillu pitsaasumik kiffartuunneqartariaqarput.

Qujanaq